

Chhuah fan - Oct. 1984

SEPTEMBER, 2014

RAMTHAR

(MISSION)



Email: ramtharchanchinbu@gmail.com

Fax No. 0389-2316410



Silchar Kohhran
Thalaite (KJS)
huaihawtin Revival
Meet ni 11-13 July
chhûng hian hlim
taka hman a ni.
Speaker Mr. Tapash
Adhykari, Kolkata.



Lungchhe taka
Halelui thawm
te chuan
thinlung a
nghawrnging a,
vân mite
pawh an lâwm
ngei ang.



2014 BEIHRUAL THLA
SERMON

'Khawvêlah a tîr a'.....phêk 4-7

Ramthar Association Chanchinbu Thla kip Chhuak**Editorial Board 2013 - 15**

Editor	: Rev. Thangzauva	9612950043 (M)
Joint Editors	: Upa Lalrinmuana	9436142643 (M)
	: Upa Zoramthanga	9436362385 (M)
	: H. Lalngurliani	9774390980 (M)
News Editor	: Lalbiakenga Fanai	9436366234 (M)
Cir. Manager	: Lallawmnakima Hmar	8575178109 (M)
Publisher	: Rev. Lalchuanmawia	9615952406 (M)

Member-te

Rev. K. Lalhmuchhuaka	: Synod Moderator
Upa H. Zoliana	: Synod Secretary(Sr.)
Rev. P.C. Pachhunga	: Exe. Secy./c. Mission etc.
Rev. C. Chawngliana	: BEC Member
Upa F. Lalfakzuala	: BEC Member



Thu chhuah tur nei chuan Email- ramtharchanchinbu@gmail.com -ah emaw Phek lehlahm chauhah ziakin Editor emaw Manager, Ramthar Chanchinbu, Synod Office, Aizawl - 796001, Mizoram, India, hnenah thawn tur a ni e.



Ramthar chanchinbu thu chhuahte hi ziaktu mawhpurhna a ni e.

KUM KHAT LĀK MAN - ₹ 50/-**A CHHŪNGA THU AWMTE**

1. Editor thukhawchāng	- 1
2. Keimahni	- 2-3
3. Beihruah pual Sermon	- 4-7
4. 'RAMTHAR' Hluttute Huang	- 8
5. Hriatzauna Huang	- 9
7. BUHHMUN AṬANGIN:	- 10-22
(1) Bialtu Pastor-in an pathian leh.....	
(2) Tabang tlāngram lamah.....	
(3) Lalpa zāra ka tawn hriat.....	
7. Ramthar Feh	- 23-31
8. Ramthar rawngbāwlina thilpék petute	- 32

BEIHRUAL

Beihrualin kum 97-na a lo tawng ta reng mai. Beihruaal hmangtu zawng zawngte kan Lalpa Isua Krista hmingin Editorial Board-in chibai a bük a che u. Beihruaal hi ringtu hmasate thahnemngaihna avânga lo awm a ni tih hriain Pathian hnênah lâwm thu i sawi ang u.

Beihruaal hi Assembly thu lût, Presbytery rêl a ni a, hetiangin: *“Kristian Beihruaalna hi June 1918-ah hian kan ruat a. Thla chawhma lam chu mahni Kohhranho tâna intih chakna tur leh intihthianghlimna leh intihngah lâwkna atân kan hmang theuh ang a; tin, thla chawhnu lam chu ringlote tâna hman tur a ni ang, mi hruai hram turin. Tin, Kohhran tinin an thawhzia dan theuh tur an ngaihtuah ang,”* tiin (Presbytery Rorel March 15-18, 1918, Aijal).

Presbytery (tunah Synod) rorêl chu kohhranhoten tha tak leh hlawhtling taka an hman avângin October 1918-a Champhai Hmunhmeltha khuaa Presbytery chuan, *“Beihruaal hi awm leh sela, kan ti tlâng a, a tih dan tur chu hmana mi ang bawh khân a ni ang,”* tiin a rêl leh a. Chawlh lailâwk awm lovin, kum 1918 aţang khân vawiin thlengin Beihruaal hi a la awm zel a; kum 1925 aţang phei kha chuan Beihruaal hi September thlaah zel hian, kum khatah vawi khat hman a lo ni ta ni.

Beihruaal hi kan hman dan inang vek lo mah se, rawt chhuah a nihna rilru kha hre reng ila: Tualchung Kohhranten thlarau lamah chakna thar lâk nan te, nun thianghlim kan neih nan te, Pathian rawngbawlina kawnga hma thar la thei tur a intuak nan te, mi chak loten chakna thar an neih nan te hma lak ni sela; tin, Chanchin Tha hre loten Chanchin Tha an hriata, Krista hnena mi dangte hruai tura ţan lak nan hman ngei tum ni bawh se a tha hle ang.

*‘Kal la, i hun zaungin thawk la,
I lâwm nân Pa duh zâung ti la.’*

KEIMAHNI

† SMB ringthar Jan-July, 2014:

Sl.No.	Buhmun	Missionary	Jan-Jun	Jul	Aug	Sep	Oct	Nov	Dec	Avain
1	Aru. 'E'	72	22	9						31
2	Aru. 'W'	104	142	40						182
3	Assam	76	60	3						63
4	Barak Area(JPM+Bengali)	86	155	30						185
5	Cachar Tlang	78	45	<small>hawn loh</small>						45
6	Delhi	18	47	18						65
7	Home Mission 'N'	172	79	<small>hawn loh</small>						79
8	Home Mission South	231	106	46						152
9	Jharkhand	33	340	19						359
10	Karbi Anglong	127	106	52						158
11	Kolkata	31	264	26						290
12	Lucknow	31	204	3						207
13	Nepal	42	131	21						152
14	Patna	33	133	17						150
15	Siliguri	33	70	3						73
16	Tripura	141	1093	91						1184
17	Mizoram Masihi Sangati	8	551	<small>hawn loh</small>						551
	July-Dec 2014	1316	3548	378						3926

1. Karawl hi 'nei lo' emaw 'dawn hman loh' emaw a nie.

2. Buhmun Ringthar dinhmun hi a chiah la hriat kim hma:

3. SMB hnuatia thawktu z.z.=2334 (Thawktu dinhmun hidanglam reng a ni.

† **Tuarpuina:** (1) Kan rawngbâwlpui Rev. Lallianmawia Pachuau, Field Secretary, Aru. 'W' chu a nau Pu Vanlalhuma Pachuau (48) chuan ni 16.07.2014 (Nilai) khân Kal that loh avângin chatuan ram a pansan. (2) Kan rawngbâwlpui Jenny Lalremruati, Evangelist Teacher, Laimeikuri, Aru.'W' a thawk chu ni 24.07.2014 khân a pa Pu Johana (48), Govt. Complex, Aizawl chuan kawchhûnga thisen pût avângin a boralsan. (3) Kan rawngbâwlpui Tv. Lalramsânga (23), a pa Vanroluaha (F), Govt. Complex Aizawl, Kaki Vengthar, Tuithumhna Bial-a thawk chu ni 25.7.2014 tlai lam dar 3:30 vêl khân Malaria natna avângin a boral. Lusûn chhûngte SMB-a thawktute leh Ed. Board-in a tuarpui tak zet a ni. Lalpan thlammuanin awmpui rawh se.

† **Masihi Sangati Kendra Thawktute Intuaitharna:** July 22 - 25, 2014 chhûng khân Chanmari Kohhran Hall-ah Masihi Sangati Kendra thawktute Intuaitharna neih a ni. Thuhritu atân Upa Denghmingthanga (BEC membar), Kulikawn leh jawnglettu atân Rev. R. Lalthangvunga an hmang. He Intuaitharnaah hian thawktu mi 164 lai an tel. Siyon Swaram, Aizawl West Area Standing Choir, Aizawl S/W Area Zaipawl, Mission Veng Masihi Sangati leh Chawnpui

Bial Masihi Sangati Zaipawlte an zai bawk. July 25, 2014 (Zirtawpni) chawhnuah sawi hona hun hman a ni a, zan inkhawmah Rev. P.C. Pachhûnga, Executive Secretary i/c Mission hnên aţangin Pathian thuchah ngaihthlâk a ni.

† **Ramthar kampên:** July 19 & 20, 2014 khân Vanzau Bial Kohhran 5-ah Ramthar kampên neih a ni a, Vanzau-ah hian Rev. Remlalfaka, Bungzung-ah Rev. Vanlalbêla, Leithum-ah Rev. C. Chawngliana, Dungtlângah Rev. Lalthankhuma, Zawngtetui-ah, Upa Vanlalngaia leh zaia rawngbâwl Tv. Rintluanga te an kal.

† **Ramthar Ni Feh chhuah:** Ni 31 Aug. khân Kohhran hrang hrang aţanga sâwmna chhângin SMB Pisapui/BEC/MTC aţangin feh chuah a ni: **(1)** Rev. Lalchhuanmawia, Tv. Lalramchhana - Zamuang Kohhran/Bial. **(2)** Thingsûl Tlângnuam - Rev. P.C. Pachhûnga, Pu R. Lalchhanhima, Pu Zorema leh zaia rawngbâwlin Nl. Lancy Remlalhruaii, Dawrpui. **(3)** Upa Lalrinmuana - Luangmual 'W'. **(4)** Upa H. Ngurkhuma, Pu Lalbiakênga Fanai, MTC - Zâwngin. **(5)** Upa Lalhmingthanga, MTC - N. Vanlaiphai. **(6)** Rev. Lalbiakvulmawia, Pu Lallawmnakima Hmar, MTC - Darlawn. **(7)** Rev. C. Chawngliana, Pu C. Kapthanga, MTC - Sihfa. **(8)** Pu C. Lalzawmliana, MTC - Tuikhuahtlâng, Aizawl. **(9)** Upa Denghmingthanga, Pu H. Vanlalchhuanga, MTC - Khanpui. **(10)** Upa Vanlalchhûnga, MTC - Samlukhai. **(11)** Rev. Lalthankhuma - Republic Kohhran **(12)** Rev. Zosangliana Colney - Nisapui

† **Zin:** July 25 & 26, 2014 hian Interserve Governing Body Meeting leh Annual General Body Meeting, Pune-ah Rev. Lalchhuanmawia, Secretary, Synod Mission Board a kal. Field Committee-a tel turin Field Committee member-te nên an feh chhuak nghal.

† **Thawktu lâk thar:** Ni 13 July, 2014 khân Hindi Bible School Chapêl, Bawngkawn-ah Masihi Sangati Evangelist atân lâk thar mi 17 Tirh chhuah Inkhawm hun hman a ni.

† **Hindi Bible School zir tûr la:** Ni 15.07.2014 khân Hindi Bible School Managing Committee chuan zir tur hetiang hian a la thar leh ta: (1) Mîpa - 20; (2) Hmeichhia - 12 State 11 aţangin *para church* - 6 leh *denomination* hrang hrang aţangin - 6 lâk an ni.



**BEIHRUAL PUAL SERMON
ISUAN KHAWVÊLAH A TÎR A**

Jn 17:18

- Rev. Vanlalrova
Khangte, ATC

Lal Isuan khawvêla a rawngbâwl hna a zawh dawn hnaihah a zirtirte tân a ÷awngñai a, an hna tur pawh a sawi bawk. Pa chuan khawvêlah hnathawk turin a tîr a, chutiang chuan a zirtirte pawh a tîr chhâwng nghal. Ani chuan tîrh a nih angin a thawk zo ta, chu hna avâng chuan Pa Pathian chu chawimawiin a awm. Pa leh Fapa Isua inzawmna chu hnathawh leh tîrh a nihna hi a ni a; chutiang chuan a zirtirte nen pawh an hna leh thawk tura a tîrhna hi an inzawmna a ni. Tih tur thuhmun hian min phuar khawm ÷hin.

1. Khawvêla a tîrh thu: Pa Pathianin Lal Isua a tîrhna chu khawvêl tih a ni a. Thuthlung Thar-ah hian khawvêl tih thumal chi 3 a awm: (1) Lei leh vâw boruak thilsiam inrem khawm mumal tak sawina ‘cosmos’. Hei hi hman tam ber a ni. (2) Mihring leh thilnung chênna lei leh boruak ‘oikoumene’. (3) Tisa khawvêl sawina ‘aeon/aoin’. Johana hian *cosmos* hi a hman rim a, kanchâng thlana mi pawh hi a ni bawk. Pathianin lei leh vâw a siam khân awmze neiin a duang a, mihring hriat thiam vek sen a ni lo. Mahse, sual vângin chhandam ngai a lo ni ta a. Chu chhandamna hna thawk tur chuan Lal Isua tîrh a ni. Chu khawvêlah chuan lo kalin chhandamna hna a thawk

zo ta. Ringtute pawhin he khawvêla awm chungin chu hna chu thawk tur kan ni.

Chhandamna hna thawk tura **“Tîrh”** thu hi ÷awngkam naran a ni lo. Grik ÷awngin ‘Apostelein’ an ti a. Bible ziaktute bâkin an hman tam lo hle. Thuneihna neia, hna bik thawk tura tîrh tihna a ni ber. Chu chu Sâp ÷awngin **‘mission’** an ti a, tîrh tihna a ni. Tichuan, Pathianin mumal taka awm turin khawvêl a siam a, sual vângin chhandam ngai a lo ni ta. Chu hna chu thawk turin Lal Isuan a zuitute a tîr a ni. Chuvâng chuan, he chhandamna hna hi Pathian hna a ni a, ringtute chu he hnaah hian thawk tura koh kan ni.

2. Isuan hna a thawk: Khawvêl mi ni si lo, khawvêl a awm siin Lal Isuan chhandamna hna a thawk a, a zirtirte pawh chutianga

thawk tur chuan a chah. Boral tur hmangaihna avângin he hna hi a thawk a, thuawihna avângin harsatna hmunah pawh a tlânchhe lo. Khawvêl hi a lal ram a nih loh thu a sawi fo.

Chanchin Ṭha hril hna thawktute hian hei hi kan hriat thar fo a ṭul. Khawvêl hi kan awm hlenna a ni lo, rawng kan bâwlna hmun tur chauh a ni. Khawvêl thil hian min hneh fona chhan chu khawvêl hi kan chên hlenna a ni lo tih kan ngaihtuah loh vâng a ni ang. Kan entawn tur chu Lal Isua a ni. Tirhkoh Petera chuan ‘a hniak a in zui theih nan entawn tur a hnutchhiah che u’ a ti (1Pet 2:21). Lal Isua rawngbâwl dan chu mi dang tâna damna, malsawmna, hlâwkna a ni a, ama tân hlâwkna sawi tur a awm lo. Mi dang an dam theih nâna tuar a ni. Hei hi mission rawngbâwl hna inngahna pui ber a ni.

Tin, a inpe zo vek. A nun a hlan. Chu inpêkna chu Chanchin Ṭha hril hna thawktu tân chona a ni reng a, entawn tur leh infuihna tur pawh a ni. Sual a do a, sual tihbuai a chhandam a, nunna kawng a kawhhmuh ṭhin. Petera sawi dan chuan mi hauhva a awmin a hau lêt ve lo, a tuar laiin a vau lo va, fel

taka ngaihtuahu hnênah a inpe zawk tih kan hmu (1Pet 2:23). Sual do hian an tih anga tih lêt lam a ni lo, fel taka rêltu hnêna inpêk hi a kawng tur a ni. Chutah chuan tuarna a awm thung ang.

3. A tirtu entawn a thawk tur kan ni:

Lal Isuan thuawihna leh hmangaihna vangin a thawk a, a hlawhtling. Kan entawn tur a ni ang. Khawvêl hi Pathian siam a ni a, Pathian duh anga awm ṭhin kha sualin a tibuai ta. Mihring leh thilnung tinrêngte chhandamna hna hi hna pawimawh tak a ni a, hmasawmna vânga khawvêl chhe mêk hi siam ṭhatu tur chu ringtute kan ni. Mi pamham leh rinawm lo te thiltih avânga mi retheite tuarna hi a va rapthlâk êm! Khawvêl ‘cosmos’ chhandamna hna hi tunlai hunah hna pawimawh tak a ni ta.

Ringtute tirtu Lal Isua thawh dan kan sawi tawh. Kan entawn dan tur hi sawi thiam a va har ṭhin êm. Mahni inpe zo veka thawh hi a lo har a ni âwm e. Tuarna kan tih fo hi rilru lama hrehawm tihna a ni fo. Missionary nih vânga chân chu kan huam a ni mai thei, mi dangin an neih bik hian kan rilru a na tel a, tuarna hêl mai kan duh ṭhin. Lal Isuan a hêl lo tih i hre reng ang u. Taksa tuarna mi kutthlâk, damloh, sikserh

leh eichhiat vânga taksa hrisêl lo, mi nuihzat leh vaute hian min tibuai thin a ni awm e. Tuarna phêna Lal Isua awmpuina hi kan beisei tur a ni ang. Tin, kawng hrang hranga harsatna tâwkte kan tuarpui hi thawktute tân thiam a ÷ul hle.

Kan unau Bru hel ten mi kut an thlâk a, pawî an khawih hian mi thenkhatin an thlarau chhandamna bâk eng mah tihsak loh an duh thin niin a lang, a pawî hle. Taksa leh thlarau chhandamna hi Lal Isua hna a ni si. Heng helhote thiltih hi *politics* ÷ha lo a ni a, pawî khawihna chu *politics* a÷anga tihfel tum tur a ni. Tifel si lo, hmuhsitna nêna *politics* ÷ha lovin ro a rêl chuan a pawî khawp ang. Lal Isua chhandamna chuan unau hmangaih anga kawng ÷ha kawhhmuh a tum thin. Taksa leh thlarau chhandamna hi Lal Isua hna a ni a. Rorêlna fel leh dik, hmuhsitna tel lo lalam a ni. Kan rawngbâwlsakte hmusita kan hna min sawisêltute avângin kan tim tur a ni lo.

India ramah sakhaw ruihchilh pâwlte thiltih hian Lal Isua chhandamna thu tlângaupui a tiharsa thin. Hnam bil rilru, sakhaw tih

bik nêna chawhpawlh hian ngaihtuahna fim a tibuai a, ÷ul lo taka inhuat leh kut inthlâk hial a thlen thin. Chu erawh zawng kan tuar a ÷ul chuan kan tuar ang. Hmangaihna erawh kan lantir tur a ni.

4. Mahni inen chiang ila: Isuan a zirtirte Chanchin ÷ha hril tura a tirha, an lo kir leh khân an rawngbâwlina chanchin an rawn thlen chu a lawmawm hle. Mahse, Isuan an lâwmna tur chu an thiltih ropui tak ni lovin, vâna an hmingziak a nih vângin a ni a ti (Lk 10:20). Ni e, kan rawngbâwlina chanchin kan thlen/sawî hian ringthar kan nei h te, Pathian hnathawh ropui tak lo lang thin te hian min tilâwm a, ngaithlatute pawh a tihlim thin. A dik e. Mahse, kan thiltih vânin a chhinchhiah hi kan lâwmna tur chu a ni zawk. Mission hna kan thawhna hmunah kan thawh dan, kan rilru put hmang hi vâv khian a chhinchhiah reng a, chu chu lang lo lama Pathian hnathawhpuitute thlamuanna chu a ni. Vâv record ÷ha kan nei em le?

A châng chuan sum tel lovin thawh harsa kan ti thin. A dik tho. Sum tel lo, mahni inphat rawngbâwlina erawh chuan mahni lamah lâwmna thar a nei a, thawhna hmuna miten an hre thin. Hnam mawl emaw, hnam fing emaw an dang lo. Keimahni hi a

pawimawh ber. Sumin ro min rêl khalh lek lek ðhin hi a pawi a ni.

Tin, kan thawh rah 'ringthar' hmuh kan duh nghal ðhin bawk. Isuan an lawmman an hmu tawh a tihho zingah kan tel ve ang tih a hlauhawm hle mai. In lama lo ðawngðai-saktute pawh hian ringthar neih thâwm a awm loh chuan hlawhchhama ngaih mai a awl ðhin. Thlêmna a ni. Ringthar kan nei tur a ni a, kan beisei tur pawh a ni. Mahse, kan rawngbâwl hna inngahna a ni lo tih hi hriat reng a ðul.

(A hun chêp tak kêra Beihruwal Sermon Rev. Vanlalrova'n a rawn thawh thei hi Ed. Brd.-in lawmthu a sawi e...Ed.)



KOHRANHO HNÊNA NGENNA

Pathian hruaiin kum 2014 kum tâwp lam kan lo thleng leh ta reng mai. Kum tina harsatna kan tawh ðhin sut kian a nih theih nân a hnuaia ngenna tar lan ang hian fel taka rêlin kohhranhovin ðan laa, ni 8 December, 2014 hmaa **Cir. Mgr. Ph. 8575178109** emaw lehkhain emaw Editor hnênah emaw ramtharchanchinbu@gmail.com-ah rawn hriattir turin Kohhran tinte ngen in ni e:

1. January, 2015 aþanga 'RAMTHAR' Agent tur
2. January, 2015 aþanga la tur zat
3. Chanchinbu man hi Synod pawisa kuma chhût lovin kalendar kum (Jan-Dec.)-a pêk ðhin tur a ni a, a theih hram chuan pêk tlâk nghal ni thei se a lawmawm khawp ang. Chanchinbu man 'Synod Ramthar' SBI A/C.10665621086 leh Bank dang aþanga pe chuan IFS Code: SBIN0007058 hmangin a pêk theih reng e. Mi mal leh pâwl chanchinbu latute pawh a huam vek a ni.

Editor
'RAMTHAR'

Tlangkawmna: Pathianin khawvel a siam khân a duh ang taka a siam a ni. Mahse, sual vângin chhandam a lo ngai ta. He chhandamna hian thilsiam zawng zawng leh chêt vélna a huam vek. *Politics* ðha lo vânga harsatna tawkte chhandamna hna leh mâwlina vânga hriselna ðha lo ûm bo te hi hna ðul taka a ni. Chu chu khawvéla awm si, khawvêl mi ni lo te hna a ni. Isuan min tirh avângin chu hna chu kan thawk a, a va ropui êm! Eng lai pawhin Lal Isua entawn tur kan nih hi hre reng bawk ang u. Amen.

RAMTHAR HLUTTUTE HUANG**DANIEL VANLALDUHTAKA**

*Pa hming K. Lalthazuala, nu hming R. Lalmuankimi,
Chhinga Veng, Presbyterian Kohhrana lawi kan ni e.*

K. Lalthazuala: Kumin chu sermon a ṭha hlawm khawp mai, Ramthar Feh nen...engkim a ngaihnawm khawp mai.

Ramthar Fb: Hlâwkpuina in nei em?

K. Lalthazuala: A hlâwk khawp mai. Sermon-na turah hian min pui ṭhin hle a, ka fapa kum 13 mi hian a mut dawn hian a chhiar ṭhin a, ngaihnawm a ti ṭhin, A têt tē aṅanga Pastor nih tum a ni bawk a, kan lawm teh asin. Thla a thar hi chuan ani hi a lamtu ber a ni a..., ‘Á pa khaw nge Ramthar Chanchinbu a ti ṭhin. Nia, Buh hmun aṅangin tih te hi ngaihnawm a ti ṭhin, a chângin a chhiar a, a nauten an lo ngaithla ṭhin. A ṭhente hi chu an lo khawngaih ṭhin hle. Sûnna te an han chhiar thleng a, Kristian tihduhdah leh Chanchin Ṭha hril leh naupang tân Chanchin Ṭha hril tur chuan lehkha zir tam a ṭul thu te pawh hi a theih chuan zeh zauh zauh a ṭha khawp ang. A châng chuan an mut dawn hian misionary-te tân pawh an chham ve zauh zauh ta, hma kan sawn a nia; naupangah hian missionary hna lam hi tuh a ngai hian ka hre thar asin. Mary Jones hi an ngaisang êm êm a. Missionary ngaihsan hi tuh tam a ṭhain ka hria. Amah hi Dawrpui Centenary School-ah hian pawl 5 zir turin kan admit a, Mizo ṭawng chhiar hi pawl khat aṅang khân an thiamtir a, ka lawm a nia âw! Ramthar chanchinbu hi an lukham hnuaiah hian an dah ve ṭat zel.

(Ramthar Fb. leh Ramthar Hluttute inkaumna lâk tawi...Ed)



HRIAT ZAUNA HUANG
BOKA HARAM-IN KRISTIANTE LAKAH INDO A PUANG

Africa khawmualpuia ram pakhat, Nigeria rama firfiak pawl, Boka Haram hotupa Abubakar Shekau chuan tunhnai khân he rama Kristian hmeichhe sikul-a zirlai 300 chuang an ruk bo hnuah thu chhuah a siam a. Hmeichhia an ruk bo chhan chu hmeichhiate hnênah zirtirna pêk an dodal satliah mai ni lovin, an rama Kristiante an beihna a nih zawk thu a sawi a. Nigeria ram ațangin Kristian sakhua leh Kristiante chu nuai bo vek an tum thu a sawi a ni.

Boka Haram hotupain hemi chungchâng a sawina hi *video* siamin darkar khat awh vêla sei a ni a. Hei hi Sahara chanchinbu miten (Reporter) Sap țawnga letin an tichhuak a. Boka Haram hotupa chuan, “Khawthlang ramín dimdawina tel lova Iraq leh Afghanistan ramte an run ang mai khân Boka Haram chuan Nigeria rama Kristian sakhua leh Kristiante chu a bei ve dawn a, Iraq leh Afghanistan ramte laka khawthlang ramte an chet dan ang chiah khân Nigeria rama Kristiante chungah pawh Boka Haram hi a che ve dawn a ni,” tiin a sawi. Abubakar Shekau chuan America ramín Iraq ram leh Afghanistan a chhu chhia ang chiah khân keini pawhin he rama Kristiante hi kan chhuchhe ve dawn a ni tiin a sawi bawk.

Boka Haram chuan Nigeria rama Kristiante leh Kristian sakhua lakah indona thianghlim puangin, an theih ang angin Kristiante nuai bo turin an bei zel dawn a ni tih a sawi bawk.

Boka Haram-in Kristiante laka indona an puan an bawhzuina thar berah tunhnai mai khan he ram khawpui pakhat, Kano khuaa Kristiante inkhawmnaah thihchhilh bomb an tipuak a, mi 20 zet an thi nghe nghe a ni.

– *Christian Post Reporter*

BUH HMUN AṬANGIN

BIALTU PASTOR-IN AN PATHIAN LEH A CHHÛNGTE BAPTISMA A CHANTIR

K. Laldawngliana, Longnit Borjan

Longnit Borjan khua hi Karbi Anglong Mission Field, Diphu Pastor Bial chhûnga awm a ni a, Mission Station thar a nih avângin Kohhranhote'n kan la hmelhriat vak awm lo ve.

Kum 2003-2004 kuma Karbi leh Kuki hnam inkâra intihbuai avânga mi tam takin nunna an chân kha kan la hre ðheuh awm e. Khami intihbuai avâng khân mi tam tak thingtlâng lama awmte chu khawpuiah râltlânin an lo tla thla a, chung mite chu mahni khuaah kir tawh lovin an inbenbelna tûr khua *Autonomous Council*-in a dinsak a, 'Model Village' tiin In 1000 lai awm theihna tûra ruahman a ni. Karbi hlang an awm khawmnaah chuan khaw lian pawl tak a ni hial awm e. Chung râltlântên zirna kâwl êng an hmuh theih nan Upa Prodip Singnar-a Diphu Kohhran Upa (*Hetih lai hian Karbi Anglong Autonomous Council-ah Executive Member i/c PWD a ni, khaw dinnaah pawh a bultumtu ber a ni*) chuan sikul dinin sikul *building* leh zirtirtute chênna pawh in hnih lai a sa a, tichuan, Synod Mission

Board-ah Working Committee kaltlangin zirtirtu a dil a, a dil ang hian phalsak niin kum 2009 aṭang khân missionary indah luh ṭan a ni a. Sikul in leh sikul enkawlna pawh High School thlengin Upa Pradip Singnar-a hian ruahmanna siamin tihpuitlin ṭhak tuma a beih laiin *politics* thil avângin *Council*-ah E/M a nihna chu hlihsak a ni a, a tum aia hmân Mission Board-ah hlan a ṭul tak avângin kum 2011 khân Mizoram Synod kutah chung *School building* leh thawktu chênna In leh ram zau tak 8.5 (biga) lai chu Rev. J.H. Zaikima, Field Secy, Karbi Anglong Mission Field kutah a hlan ta a. Synod Mission Board-in enkawl chhunzawmin tun dinhmunah Kg I to Class V thleng hawngin, zirlai 320 neiin thawktu pawh zirtirtu 9 leh nurse 1 lai kan awm ve tawh a ni.

Longnit Borjan hi Kohhran puitling lo awm tawh sana a ni a, nimahsela, kum 2009 kuma missionary-te thlen

thlâk lai hian In 15 bawr vêl an la ni mai a, Sikul-te hawnga rawngbâwlina kawnga hmalak a nih chhoh takah chuan min ṭawngṭaipuina zârah, Pathian malsawmna dawngin kâr lovah Kristian pawh kan pung ve zêl a. Kohhran in dang tham hial te ni chhovin, kum 2011 kum khân Dungkeklangso hmunah *Fellowship* din a lo ni ta a, kum 2012-ah Langparpan-ah *Fellowship* din leh in kum 2014 Bial Inkhawmpuiin min phalsak angin *Preaching Station*-ah hlan kai chhoh a lo ni ta a ni. Hemi chhûng hian Pathianin a Kohhranhote min hruai dan leh thil ropui tak tak min tihsak sawi tur tam tak a awm thei awm e, chung zawng zawng chu tun ṭumah hian kan sawi seng lo va, sawi loh theih loh erawh chu - Thedong Hanse-a te chhûngkua Lalpan a Kohhranhote zinga a rawn hruai luh dan hi a ni.

He mite chhûngkua hi Lokhimon Dhormo (Aron Kimi-Karbi Sakhaw thar) zuitute an ni a, an pu ber Thedong Hanse hi an sakhaw puithiam niin, an tupa Boron Hanse chu an Pathian (Hemphu) a ni thung. Boron Hanse-a hi a chhûngte leh Aron Kimi-hote chuan a hming pawha ko lovin Hemphu (Lalpa) tiin an ko mai ṭhin. Amahah hian thiltihtheihna

(power) neiin damlo leh harsatna neite'n an pan ṭhin a, an chhûngkua hian Mandir (an pathian Biak in) neiin, sakhaw mi tak chhûngkua an ni. Tin, Longnit Borjan Area-ah chuan Lokhimon Dhorom (Aron kimi) sakhaw zui hmasa ber chhûngkua an ni bawk.

June, 2014 khân Lokhimon-a (an sakhaw dintu) an hotupa ber chu a boral a, chumi hnu lawkah, kan khaw piah lawk Sing Bey khuaa an puithiam lian ber a boral leh a, a dawttu chu Boron Hanse hi a ni tawh mai a. Amaherawhchu, an hotupa Lokhimon-a thih hnu hian a thiltihtheihna (power) te chu lâksakin a awm a, zan khat chu inlârna/mumang ang neiin Hindu sakhua nêna an inzawmna zawng zawng chhu chat vek tura hriattirin a awm a. Chu hriattirna avâng chuan zan pawh mu ṭha thei lo leh chaw ei mumal thei lovin hlau leh thlabâr takin a awm a, chung a chanchin hria chuan Longnit Borjan Station-a missionary-te an inah lêngin an zuk titîpui a, chumi zan chuan an inah ṭawngṭaina te hmangin inkawmna hun ṭha tak neih a ni a. Tichuan, a tuk ni

04.07.2014-ah inkhawmna hun hmang tura sawm zui nghal an ni a. Missionary-te'n ei leh in te buatsaihin kohhran mite inah, an chhungkua leh thenawm khawvengte sawmin Pathian thu sawina hun remchâng tak neih a ni a. Darkar 3 dawn lai inkhawmna neiin chhandamna thu ngaihthlák a ni a. Tichuan, tlaiah an ei thiàng lo vawk sa (Aron Kimi te hian vawk sa an ei thiàng lo a ni) ngei chawhmea siamin, ruai ropui tak theh chhunzawm nghal a ni. Tichuan, ni 06.07.2014 Pathianni-a Baptisma chang tura intiin hlim taka hun hman a ni.

Hetih lai hian Setan-a pawhin a theih ang tawkin òan a lo khawh ve a, an khaw hotupa (Gaonbura) chuan Kristian-a an luh dawn thu leh Mondir hial òiah tur thu chu lo hriain, a thinrim chuan an inah luhchilhin an khua ațanga hnawh chhuah-ah a lo vau ve mek bawk a. Nimahsela, heng ringtharte hian Setana áwká chu engah mah ngai duh lovin, an dinna ngaiah dingnghetin baptisma chang turin nghákhlel takin an thlir ve thung a ni. Ni 6.7.2014 Pathianni lo thleng tur chu Kohhranhote kan phûr hle, Kraws Sipai-ten Mondir-a an pathian biakna

hmanrua chi hrang hrangte rut khawmin Biak In-a hâl turin zingkárah an lo la khawm a. Bialtu Pastor Rev. Benny Lalmawia, Rev. Samuel Hanse leh Upa Prodip Singnar-a hovin, Diphu-a kan rawngbâwlpui missionary eng emaw zat an rawn thawk pheih bawk a, a thlamuanthlâkin min rawn tiphuisui ngei mai. Chawhma inkhawmah Bialtu Pastor kutah an chhûngkaw member 14 leh chhûngkaw dang ațangin member 1-in Lalpa hmaah inhlanna thutiam baptisma an chang ta, a va ropui êm! Lalpan ropuina chang rawh se. Inkhawm banah Biak In tualah an Mondir bungrua buara thum (bag 3) lai mai chu chhûng vumin òawngtaian Pathian hnênah hlan a ni a, tichuan, Pathian ropui nan Kohhranhote ban phârin 'Hnehna chu Lalpa ta a ni', 'Lalpa chu ropui ber rawh se', tia hnehna puangin, chung milem pathian biakna hmanruate chu hâlral a ni ta a ni.

Chawhnu Inkhawm bânah an in lamah *Home Service* neih chhunzawm nghalin, Rev. Samuel Hanse-an a kaihruai a; kum eng emaw zat an pathian biakna in Mondir chu kohhranten kan

thiat ta a. Chu Mandir hmunah chuan Kohhrante ding kualin tawngtai rualin Lalpa tân hlan thianghlimna kan nei a, a va ropui êm! Hemi ni hian Thlarau Thianghlim hnathawh a lang nasa hle. Baptisma Inkhawm aţangin *Home Sevice* thlengin Halleluia thawm a reh lo va, taksa chetna nen Lalpan a ropuizia a puang chhuak, Kohhranhote kan hlim hle. Longnit Borjan khuua ringtharte hi vauna leh rikrâpna nê; ringloten an sakhaw hluia kir leh turin nasa

takin an bei thin a, Lal Isua hnung zui avânga khua aţanga hnawh chhuah te, chhûng leh khatte'n an tuithlâr te, thihna an tawh chânga khawtlângin thlanmual an pêk duh loh te an ni. Nimahsela, hawi kir leh zai rêl lovin nghet takin hma lam panin an kal ve zêl a ni. Kohhranhote bang lovin i tawngtaipui zêl ang u. (*Inhawina bungraw hâl lai a kâum hnung chhûng lamah dah a ni e....Ed*)



TABANG TLÂNG RAM LAMAH

-Rev. P.C. Nghâklianmawia,
Kakarvitta, Nepal

‘Tlâng lamahte khian ka mit ka lên chho vang’

Tabang chu Nepal rama Ilam *district* chhûnga thingtlâng khaw pakhat a ni. A khua hi tlâng chhipa awm a ni a; thingtlâng khaw lian lem lo tak a ni. He khaw bul lawk (kea darkar thum vel kal) Pitambaru khuuah hian kum 2012 November ni 3 khân kohhran (fellowship) thar kan lo hawng tawh a. Chanchin Tha hrila kan chetvêlna thâwm vel chu helai Tabang khuua mite hian lo hriain, “Isua chanchin minrawn hrilh ve rawh u, Isua rin kan duh ve e,” tiin minrawn au a. Tichuan, helai (Pitambaru) kan ringtuten an thiam ang ang leh an phâk ang tâwk tâwkin hma an lo han la ve thin a. Tichuan, kum 2013 kum tawp lam aţang khan kan bial (Kakarvitta) chhûnga thawktu thenkhatten inkhawm hranna neihpui pahin Chanchin Tha an han hril a. Thawktute an haw hnuah pawh Pitambaru lama kan ringtharten an lo han vil ve reng bawk a. Tichuan, zawi zawiin Pathian hnathawh a lo lang chho zel a, Kristian nih duh an lo pung zel a, baptisma te chantir paha *Film show* leh *free medical clinic* puitham deuh nei turin ruahmanna siam a ni zui ta a. Tichuan, June ni 13-15, 2014 chhûng

khân bialtu Pastor hovin bial chhûnga thawktu mi 6-tenen Chanchin Ṭha hril beihpui nei turin kan han kal ta a ni.

Kalkawng: Kan sawi tawh angin Tabang khua hi Ilam *district* chhûnga khaw pakhat a ni a. A awmna hmun hi tlângram (*Himalayan range*) a ni a, a khaw kalkawng leh khaw thlêng awm dan pawh Mizo khuate nen a inang hle. Kakarvitta aṭangin zing dar 6 velah kan chhuak a, Birtamode-ah Ilam *district* lama kal motor (sumo) kan châng a, heta ṭang hian motor tē (sumo) in Ilam kan pan a, Ilam-ah hian tûkṭhuante kan ei zawhin kan kal leh nghal a. Rakhe-ah kawng peng a lo awm a, pakhat chu Taplejung panna kawng a ni a, hei hi Nepal rama kan Synod-in mi a tirh hmasak berte zing a mi Hom Karna Puri (*Baptisma license te pawh a pêk*) awmna khua a ni. Kawng pakhat zawk chu Mangalbare panna kawng a ni a, he kawngah hian kan kal zel a, heta ṭang hi chuan a kawng pawh Jeep *road* kan tih ang chi alkatra la luan loh a ni a. Fur lai phei chuan kawng a diakin a khuar nasa a, a hlauhawm thei hle. Kan chuanna motor-te hi an han tawt thei khawp

a, mi 10 ṭhutnaah mi 12-te, 13-te min han êkbeng mai ṭhin a. *Driver* motor khalh pawh a saisir tluan zak zel! *Driver* ṭhutna zawnah mi 3 te an ṭhut tawh chuan duhtawka motor tuaivir a har tawh ṭhin reng a ni. Chawhnu dar 3 vèlah tuang takin Pitambaru khaw dai kan thleng a, kan bungrua kan la thla a, kein Pitambaru-ah kan lût a. A tûk chu Inrinni (*Nepal rama kan chawlhni, inkhawm ni*) a nih avângin Pitambaru-ah hemi zan hi kan riak a, a tûkah kan inkhawm a, Tabang aṭang pawhin an rawn inkhawm thla a, mi 7 laiin baptisma an chang nghe nghe a ni.

Tabang kan lût ta: Chawhnu inkhawm banah kan insiam sawk sawk a, Tabang khua pan turin kan chhuak leh ta a. A khua hi tlâng chhipa awm a ni a, motor a la luh chiah loh avângin Pitambaru aṭang hian kea kal a ngai a. Pitambaru aṭang hian km 5 vèla hla a ni a. Chuta ṭang chuan ke hlirin Pitambaru khuaah hian Inrinni-ah inkhawm turin an rawn kal ṭhin a, naupang pawm chungin an rawn inkhawm zat zat a nih chu maw le! An

fakawm teh asin! A hlat tham deuh avangin tukthuan ei lovin an rawn inkhawm mai a, inkhawm banah an haw hnu-ah chaw chu an ei leh mai. A khaw tlang bulthut atangin ngil takin kan lawn chho zar zar a, a chho ulh hle. Zanriah bawp man hmanin hah thikulin tlângchhip khua chu kan han thleng a. Nipui lai a ni nâ-in a khaw boruak erawh a dai ruih mai a, a hahdamthlak hle. Kakarvitta lamah rizai kan sin lohna a rei tawh nen, helaiyah chuan rizai sin lovin a lo mut chi awzawng lo va, Himalaya vur tlangin a rawn tivawt pha hial emaw tih mai turin a boruak a dai vawt ruih mai. Kan inngahna leh thlen inpa Man Prasad Limbu hian fa 13 teh meuh mai a nei a, in kan han thleng pawh an rual tha seng sawng bawk a, an che sap sap mai a, hmuhnawm tham zet an ni. Thlen inpain vawk min lo talh te kha min duhsakzia hairual a ni lo. Kan chám chhûng zawngin kan ei seng lo a ni ber e.

Rawngbâwlina chu: Kan thlen zanah hian Kristian film kan chhuah nghal a, kan thlen inpain a in bathlarah pandal a lo buatsaih rup mai a, ruah a sur pawha film chhuah a buai loh nan a chungah rangva a lo phah bawk a, an

lo inbuatsaih nasa hle. A tukah nilengin kan nurse Maengi hovin Free Medical Clinic neih a ni a, an hlat hle. A khaw nawtin an lo kal emaw tih mai tur a ni. A khaw chhung chauh ni lovin khaw thenawm atangte pawhin an lo kal a, nilengin mi 85 lai inentir an awm. Hetiang thingtlang khaw tê-ah chuan heti zat an lo kal thei hi an fakawm hle. Tlaiyah damlo na zual, mahni pawha rawn kal theilo te chu an inah kal chilhin damdawi pein tawngtaina te kan zuk neihsak bawk a. Hemi ni vek hian mi dangin khaw chhung fangin Isua chanchin hrilin leh Bible tract te semin nilengin hun kan hmang bawk a. Zan lamah film show kan nei leh a, entu pawh an thahnem ve hle. Film show hi Nepal ramah kan hmang tangkai hle a, Kristian film kan chhuah avanga ringtu lo ni ta hi eng emaw zat kan nei a ni. Tabang khuah rawngbawlina kan neih chhung hian mi pathumin baptisma an chang leh bawk a. Pathian hnathawh ropui tak tak kan hmu thin a. Taksa chau thin mah se rilru

erawh a hlim thung. Heng baptisma changte hi a hmaa kan thawktuten hun eng emawti chen Kristian ni tura thu an lo intiamtir tawhte (grahan) an ni a, rinna kawngah pawh an ngaihtuahawm lo hle a ni.

Kiriat puithiam bungrua kan hâlrâl: Kan thlen tûk zingkârah min rawn ko va. Pitambaru-a bapatisma kan chantir Guru Prasad Limbu-a kha Kiriat puithiam/ chairman a lo ni a {*Kiriat sakhua hi Nepali hnam pakhat Rai hnamho sakhua deuh bik niin an sawi thin a. Hindu sakhua ațanga peng ve tho a ni a, mahse mak ve deuh chu Judaism nen pawh inanna thui tak an nei tlat nia. Thuthlung Hluia hruaitu Mosia leh Josua tihte pawh kha an lo hre khawp. Mahse, Isua erawh chu an hre thleng lo thung ni awm tak a ni*}. Kan ringthar Guru Prasad Limbu chu, chu Kiriat sakhaw puithiam chu a lo ni reng a. Ama sawi dan chuan Hindu sakhuaah hun rei tak thlamuanna a lo zawng tawh a. Mahse, nun chhngriila hlimna tak tak a hmu ngai lo va, a beidawng chu Kiriat sakhuaah hian a lût leh a, hetah pheii chuan member satliah mai ni lovin a hotu ber, puithiam dinhmun

thlengin a han invawrh chho hman a. Mahse, chutah pawh chuan a zawn thlamuanna chu a hmu chuang lo va. Kan thâwm vêl lo hriain Kristianah hian a thil zawn chu a awm dah law maw tiin an rawn kal a lo ni a. Chu a thil zawn chu Lal Isua a neih chinah a lo hmu fiah ve ta a. 'Kei leh ka chhngte erawh hi zawngin LALPA rawng a ni kan bawl dawn ni' tiin a nupui fanaute nêh, an chhûngkuain baptisma an rawn chang ta a ni. Pathian themthiamzia hi mihring chhût chhuah phâk rual a lo ni lo ve.

Tichuan, hemi tûkah hian min rawn ko va, an sakhaw hlui wawn laia an inthawina bungrua leh ilo zawng zawng chu hâl ral a, tihral an duh thu min rawn hrilh a. Phûr takin thawktute nen kan zuk kal a. An inah chuan kan inkhawm a, an inthawina leh pathian biakna bungrua zawng zawng chu pawnah an rawn theh chhuak a, Pu Guru Prasad-a pawhin a *testimony* a sawi a. An bungruate chu kawtah kan din hual a, Lal Isua hmingin kan hâl ral ta hlawm a, thir leh dar-te chu kan chhu chhe vek a, leiah kan phum bo zui ta bawk a. Chumi zawh chuan kut invuanin kan

ding kual a, kan ṭawngṭai rual ta a, 'Isua rinawm tak a zui ka tum ta...ka hawi kir lo'ng' tih hla kan han sa chu kan sa tui teh asin. An thlahtute aṭanga rinawm taka an vawn, inngah nan leh an nun kaihruaitu atâna an lo hman ve ṭhin, an sakhaw hlui kalsana, engkim huat, endawng leh hmuhsit, nuihsawh tuar huama Isua zui ngamte hmêl hi a hmuhnawm a, vânlâwmna dâr khawn rik-tirtute hmêlah hian vantirhkoh hmêl a lang ṭhinin ka hria. Pathian hruainain rawngbâwlna hlawhtling tak kan nei thei a, kham lo takin kan hun kan hmang ral a. Tabang khuaah hian ringtu/ringthar mi 27 lai kan lo nei thei ta a. Kakarvitta Pastor Bial Standing Committee chuan *fellowship* thar hawn turin ruahmanna a siam mêk a. Pathianin rem a tih chuan kumin September thlaah hian *fellowship* thar hawng turin ruahmanna kalpui mêk a ni. Nepal ramah hian tlângram lama rawngbâwla

feh chhuah hi a hautak êm êm mai a {Tuna kan han kalna pawh hi mi pakhat kal lam leh haw lam senso hi cheng sanghnih dawn lai a tling}. Senso a hautak avângin duh angin chhuah a harsa a. Chung kan harsatnate chu Zoram kohhranhote hriain *project list* kaltlangin sum leh pai hmangin min rawn pui ṭhin a. Tun ṭuma kan vah chhuahna senso pawh hi Zarkawt Kohhranin *project list* an rawn chhân hmangin hetiang rawngbâwlna hi kan nei thei a. Kohhranhote chungah kan lâwm hle a ni. Tlângram lamah hian rawngbâwlna tur hmun a la tam êm êm a, Zoram kohhrante pawhin *direct evangelism* atân hian theihtawp rawn chhuah zel thei ula a lâwmawm ngawt ang. Sum leh pai hmanga in rawngbâwlna avângin Lal Isuan thlarau bo a man zêl a nia. Buh seng tur tam tak a awm a, hnathawh turin min hmuak mek a ni. ṭawngṭai leh thilpêkin ṭan i la sauh sauh zêl ang u./



Lal Isua lo kal lehna chungchângte kan sawi ṭhin; khawvêl mihring zatve zet chuan a lo kal hmasak chanchin pawh an la hre lo asin!

– **Oswald J. Smith**

LALPA ZĀRA KA TAWNHRĪAT*Lalpanliani, Laimekuri, Aru. 'W'*

Kumin 2014 hi Pathian khawngaihna avānga Missionary hna ka thawh kum 25-na a lo ni ta a. A rawngbāwl min phalsaktu leh vawiin thlenga a kut chaka min hruaitu kan Pathian ropui chu fakim awm rawh se! Lei leh vāna thuneihna zawng zawng neitu, tlākchham rēng rēng nei lo ni mah sela a rawngbāwl tura kei pawh min lo pawm ve hi ka lāwm a, he kum 25 chhūnga a tāna ka tih chhuan tur awm lo mah sela malsawmna tam takin min vur bawk si. Chuvangin, he kum 25 chhūnga ka thil tawn thenkhatte han ziah ve ka chāk a, sawi tur nei tlēm ber ni mah ila inthlahrung lovin, Pathian ropui nān ka han thai lang ve a ni e.

Meitei-te hnēna Chanchin Ṭha hril turin ni 23 March 1989 khān Manipur leilung ka rap ṭan ve a. Ka pa leh ka nau Maṭhai nēn Thlawhnain Silchar aṭangin Imphal Airport-ah ka ṭum a. Chuta ṭangin kan Mission hmunpui Presbyterian House kan pan ngal a, chutih laia Field Secretary Rev. V a n l a l c h h ũ n g a - t e chhūngkuain min lo dawngsawng a. Pu Chhūngan *Compound quarters* zawng zawngah min len kualpui a. Missionary, ka lo ngaihsan leh ka lo ṭawngṭaipui ṭhin Nl. Hmingthansangi chēnnaah lūtin kan han inhmelhriat a, a hlimawm ngei mai. Missionary zingah ka hming ziah luh a lo ni ve ta reng mai. Good Friday leh Easter Sunday chu Imphal-ah hmangin a karlehah ka awmna tur Moirang-ah min dah a. Pastor *quarters*-a ka mutbu leh

suitcase pakhat ka'n dah lut ngāt te kha ka mitthlaah a la chām reng ṭhin. Hmanni lawk angin la chiang mah se la kum 25 lai a lo ni ta si.

Moirang LCM High School-ah chuan rawngbāwlina chu ka thawk ṭan ve a. Ka thawhpuite ṭhat dan leh min hmangaihziate kha aw! Tunhmaa la inhre ngai reng reng lote kha chhūngkhatah Lalpan min siam a, thisen lamah inzawmna nei lo mah ila Lalpan 'Vah' tam tak min pe a (*Missionary nulate hi thawktu faten 'Ka Ni' tiin min ko ṭhin a ni*). Nu leh pa, u leh nau, chhūngkhatte leh ṭhian ṭha tam tak Lalpan min pēk belh bawk a ni. Kum 1990 aṭangin Evangelist-in ka awm ta a, Manipur-a ka awm chhūngin heng hmun – Moirang, Ningthoukhong, Awangkhnou, Kwakeithel,

Kumbi, Mayang Imphal, Wangoi, Nambol leh Bisenpur-ahte hian ka awm ve a ni. Manipur ka thlen aṅanga ni 28-na ni 19 April 1989 chhun thingpui, sikula kan in lai takin NI. Lalbiakchhūngi Wangoi-a Evangelist-a awm mēk Meitei tlangvāl pahnihten *motor cycle*-a an hnuh hlum thu ka han hria chu a va na em! RIMS Hospital kan pan nghal a, *postmortem* an tihna hmuna a ruang duhawm tak mai kan han hmu chu a hrilhaitlak in a uiawm tak zet a ni. Field Secretary chēna inah kan tlaivarpu i a, a tūkah Moirang Biak Inah ropui taka inkhawmpui in Moirang chhaka kan Mission thlanmualah Board Secretary Upa Lalliansawta leh Chhungi ūte – Rev. Dr. R. Lalbiakmawia leh NI. Lalbiakhliri –ten a ruang an rawn hmu hman te khan min tithlamuang sawng sawng hlawmin ka hria. Chhūngi hian rei lo te chhūngin Meitei ṭawng ṭha takin a thiam a, a thih hian kum 22 mi chauh a la ni.

Missionary ve ta chu kum lamah leh rilru lamah naupangin fel lo hle mah ila Kohhranah leh rawngbāwl-naah a kūl a taia ṭan ve te a ngai ṭhin a. Tunhnua ka han thlir kir chāngin Pathian min lo hliahkhuhnaah ka

lawm ṭhin. Chauh leh beidawn rum rum chāng awm mah sela Lalpan min tichak leh ṭhin. Ringtharten an harsatnate ṭap chung a min hrilh chāngte hian missionary ka lo ni ve hi nihlawh ka inti ṭhin. Pathian khawngaihna azārah ringthar pahnih (2) thi tur ka dawm hlum ve a; Kumbi-a pitar phei kha chu ka malchunga ka pawm lai in a chatthla a ni. Bisenpur biala Khoijuman-a kan Kristian, Madonna-i thihni te kha ka theihngihl tawh awm lo ve. Hnute *cancer*-in rei tak a nā a. Kan ṭawngṭai bawk a, a awm ngaihna hre lo chu a chāngin a pasalin a pua a, a hla duh zāwng kan sak in a hmui phunin min lo zawm ve a ni. Meitei hian mitthi an hlau va; chuvangin, an thih dawnah an dah chhuak ṭhin. Amaherawhchu, Madonna-i chu anmahni *room*-ah ngei kan thlah liam a, a ṭawng peih tawh loh hnu pawhin a beng bulah Isuan a hmangaih thu kan hrilh mawlh mawlh a ni.

Krismas lai hi Mizoram ngaihawm hun lai tak a ni awm e. Missionary kal tirha tuar har pawl tak a ni in ka ring. Ka kal kum Krismas ur lāwk zana *current* a han awm

lo tlatte kha mak ka ti a, tunhnuah chuan mak ka ti ta lo. *Motor*-a tlân ngaiin a tlân reng a, *bazaar* an thut ngaiin an thū reng bawk a, danglam a va han tlēm êm! Kan ringthar tlēm tēte nēn Krīsmas hla kan thiam chhun tlēm tē kan sa kual thīn. Urlāwk zan leh Kum hlui thlah zanahte tlaivar ve kher kan duh si a, khaw vāwt tak hnuaiāh buhpāwl chungah mi tlēm tē kan zai thēm thēm thīn te, a zai thei deuhthe an han in-*solo* siak thīn te khān lung a tilēng ta hle mai.

Evangelist-te ringlo kawm tur zawngin kan han chhuak a, kawm tur remchāng han tawnte kha a va nuam thīn êm! Tūm khat lēna tur mumal hre lo tak leh phūr vak lova ka chhuah ni-a ka tawn fuh tāk chhūngkuate Lalpan an mit tihvārsakin an chhūngkuain ringtu an lo ni ta! Lalpa chu fakīn awm rawh se! An nula pakhat phei chuan, ‘Pasal Kristian lo neih ai chuan pasal nei lovin ka awm mai ang’, a ti a. Tunah chuan Lalpan a pasal atān Kristian tlangvāl thā tak a pe a, Kristian Dānin pasal a nei tawh a ni. Mi thenkhat, kan kawm tirha khīrh tak leh beiseiawm lo taka langte

Pathian Thlarau zāra ringtu an ni ta han hmuhte a va han nuam thīn êm! Thenkhat, kan thiam ang anga Pathian Thu kan lo hrilh thīn, kan chhuahsan hnua *baptisma* an chan thu kan han hre leh thīnte hian min tilāwm êm êm thīn. Amaherawhchu, ramtharah hian ringtu tlēm tē chauh an la awm avāngin kan ringthar nula leh tlangvālte tāt nupui pasal zawn chungchāngah harsatna an tawk fo thīn a ni. Kan Kristian nula duhawm tak takten ringlo pasal neia Hindu chhūngkuāa an han lawi lūt leh ta mai han hmuhte hian rilru a na vawng vawng thīn. Rinnaa an din ngheh nante leh nupui pasal thā tak Lalpan a pēkna turin i tawngtāisak thīn ang u.

Manipur-a kan rawngbāwlna chanchin ka sawi a, ka hmāih thēlh hauh loh tur chu Kohhran Hmeichhe rawngbāwlna hi a ni. Mizote anga hmeichhe zalen tak an ni lo va. Chu bākah, ‘mo’ dinhmun pawh keini Mizote ai chuan a la ‘mo’ zawk a ni. Chuti chung chuan Kohhran Hmeichhiaten Chanchin Thā hrilnaah kan bei nasa ve hle thīn. Nau paw chung pawhin *Gospel tract*-te kan sem a, Buhfaitham leh

Financial Campaign, Kristian Chhûngkaw *Campaign, Seminar*, adt., kan bei nasa thîn a, a va han ngaihawm ta êm! Bial leh Central Hmeichhe Inkhawmpuite hi thlasik lai a ni chungin nuhoten nau nen mutbu tlêm tê kengin mutna mumal lo takah kan han inkhawmpui te kha a lo va han hlu tak êm! Sunday School naupang inkhawmpui kan neite hi a hlimawm thîn teh a nia. Naupang an la tam si lo va, Beginner pawl rual leh tleirawl uaih tawhte, pawl khata awmin thu leh hla inang zirin an intihsiak ve thîn a. Thenkhatin an *school uniform*-te an rawn ha bawk a, a hlimawmin Zoram lam ngaihtuahin rual-awh a na duh ngawt mai.

Kan ram emaw kan tih mai, Manipur Mission Field chu chhuhhsan a lo ÷ul ta a. Tha thum tawh lamah Arunachal & Assam Mission Field West-ah Lalpan min dah ve ta a. Zirna kum 20 chuang lai ka chawhhsan hnuin Jubilee Model School, Laimekuri-ah Evangelist Teacher-in ka awm ta tlat mai le. Mahse, kan Pathian a tha êm a, Headmaster, min hre thiam tak leh a hminga ka lo thawh rei ve tawhnate min hlutsaktu bulah min dah a,

ka lawm tak zet zet a ni. Tunah chuan a hmaa ka awmna Field angin a ram mite ÷awng ngeiin thu ka la sawi thei rih lo va. Ni tin naupang zirtir leh *devotion*-a Pathian thu sawi te leh ÷awng thiam te thlazar hnuaiia ringlote kawm chu ka theih tawk a lo ni ta a. Tih theih nei tam lo mah ila a thuhretu ni tura tun thlenga Mission Field-a Lalpan min lo la dah ve hi ka va lawm tak êm! Kan Lal Isua thusawi, “Nangni mit erawh chu a vannei a ni, a hmuh thîn avangin; in beng pawh a vannei a ni, a hriat thîn avângin” a tih te kha ka hre chhuak fo thîn a ni.

Missionary ka nih ve avânga malsawmna ka dawnte hi ka sawi sêng lo. Kohhranhote min ÷awng-÷aipuina leh ngaihsakna te, chhûngte leh thenrualte min hmangaihna leh duhsaknate hi ka dam chhûng zawngin ka rul thei lo vang. Sum leh pai leh silhfente lamin ka mamawh min phuhrûksak thîn a, ka thawmhaw tam tak inkhai dalte hi ka thlir thîn a, keima lei ve chu hmuh tur a vâng thei hle. Keimah chauh ni lovin, kan chhungkuain Pathian hausakna zâr kan zo

nasatzia te hi âw! Kan chhungkaw tana a mi hman thin zawng zawngte hnenah lawm thu ka sawi a ni. Missionary-a ka chhuah dawn khan ka chhuahna, Ramthar Veng Kohhran Biak Inah Synod Mission Board-in thlahna a siam a. Rev. R. Lianbuanga leh Upa Lalramthanga te an lo kal a, chuta Rev. R. Lianbuanga thusawi ka hriat rengte chu: (1) Tuarna leh channa tel lovin mi dang tân malsawmna a nih theih loh. (2) Huam phawt tur a ni a, a takah chuan Pathianin min la ngaihtuah ang. Hêng thu pahnihte hi ka rilru-ah kum 25 chhûng hian a riak rengin min kaihruaitu tha tak a ni a, ka nunah pawh a thleng dik fo thin a ni.

Missionary ka kal tirh khân mi thiam leh fel zawkte Lalpa grêp huana thawk turin inpe thei se ka ti hle thin a. Tunah chuan khâng huna ka duhthusam kha a lo thleng ta a, ka lawm ngei mai. *‘Tunah hian piang nawn leh thei la, eng hna ngei i thawh duh ang?’* tiin min zawt sela, *‘Pathian tâna missionary niha Chanchin Tha hril bawh hi ka duh ang a, tun aia hlâwk zawk leh tangkai zâwka raung ka bâwl theih nân uluk takin ka inbuatsaih ang’* tih hi ka chhanna tur a ni e.

“Tin, a nungate chu anmahni tân an nun tawh lohva, an thih aia thia tholeha tân chuan an nun tawh zawkna turin a ni ,mi zawng zawng thih aiin a thih ni.” (II Kor. 5:15)



SÂWMNA

Karbi Anglong Presbyterian Churh (KAPC) din kum 25-na **‘SILVER JUBILI’** lawmnaa lo tel turin Kohhranho kan sâwm a, mi mal hnêna sâwmna thawn kim a harsat avângin heng mite phei hi chu lo tel ngei tura sâwm an ni a, hei hi Field pisapui ațanga sâwmnaah min lo pawmsak turin kan ngên a che u:

A hun: Ni 13.10.2014 (Thawhtanni)

1. Field Secretary lo ni tawhte
2. Pastor lo ni tawhte
3. Missionary awm tawh zawng zawng

Rev. J.H. Zaikima
Field Secretary
Karbi Anglong Mission Field

RAMTHAR FEH**A.**

1. **Field hming** : Cachar Tlângram
2. **Khua / Mission Centre** : Winchester School, Ramhlun Boarding, Tlângpui
3. **Tlawh hun chhûng** : 14th – 18th Oct. 2013
4. **Tlawhtu Kohhran** : Ramhlun Venglai Kohhran Pavalai Pawl,
5. **Kal zat** : Mipa 28
6. **Tlawh chhan** : Hnathawh
7. **Hnathawh** : Sikul hmun laih zau
8. **Senso** : ₹ 49,217

9. Lawmna lam: Mission Compound kan thlen aţangin thawktute'n min lo dawngsawng ţha êm êm a, kan Synod hmalâkna ropui tak kan hmuhin lungawithlâk kan ti a, kan Missionary-te inpêkna a ropuiin a hlu kan ti hle.

10. Thu belh: Kan hnathawh (work camp) hi sikul in thar sak mêk sir kual (kawm) laih a ni a. Ft. 80 vêla thui, ft. 6 vêla sang leh ft. 4 aia zau deuha laih zawl a ni. Patling rual hnathawh a nih avângin a hmun thawktute rin aiin kan lai zo rang a, lawmawm kan ti hle. Hna thawh tur a tam a, a hnaih bawk avângin hnathawka ramthar feh nan intihmuh chi tak niah kan ngai. A hmun a nuam a, a rama lo chengte hi Mizo hnahtlâk Sakechep hnam an ni tlângpui a, thawktute tan pawh hmun nuam tak ni turah kan ngai. Tui harsa erawh ngaihtuahpui theih ni se a duhawm hle.

Rohmingthanga Colney, Secretary

Ramthar Committee, Ramhlun Venglai Kohhran

AW.

1. **Field Hming:** Barak Area.
2. **Khua:** Udharbond
3. **Thawh hun chung:** 24th – 28th October 2013
4. **Tlawhtu Kohhran:** Saitual Presbyterian Kohhran
5. **Kal zat:** Mipa – 16, Hmeichhia – 2
6. **Tlawh chhan:** Hnathawh
7. **Hnathawh:** Compound brick-a hung
8. **Senso zat:** ₹ 41, 265
9. **Lawmawm lam:** Udharbond Pastor Jerome Lalchhuanga leh missionary Albert-a ten Silchar Mission compound-ah min lo hmuak a kan lâwm hle a ni. Kan hnathawh chu Pastor

Quarters bula ram lei thar brick a hung a ni a, ban sawm leh pahnih (12) kan phun a, *tie beam* siamin ft. 82-a sei, ft. 6-a sângin kan rem a ni. Ni thum chhûngin kan ruahman ang chin chu kan hung zo thei a ni. Kan châm chhûngin Pastor, missionary leh *field worker*-te inpêkna a fakawm hle a ni. Khaw lum lai a ni a, Kohhranhote min tawngtaipuina avângin chhun ni sat vânglai pawhin hrehawm ti lutuk lovin kan thawk thei a, Pathian hruaina kan dawng nasa hle a ni.

10. Thubelh: Udharbond khua hi khaw lian ve tak a ni a. thawktu chhûngkua in thum an awm a. A khaw mi chu Kristian an la awm lo a ni. Kum 1986 vêlah khân baptisma chang pakhat chu a awm ve tawh a ni awm e. Udharbond-ah hian Pathian ram zauhna turin hmalâkna tur a la tam hle.

P.C. Lalruatkima, Secretary,

Ramthar Feh, Saitual Presbyterian Kohhran, Saitual

B.

1. Field hming: Tripura

2. Khua/Mission Centre: Sukmohan (Udaipur Bial)

3. Tlawh hun chung: 26 Nov. – 6 Dec, May 2013 leh 13-23 Dec. 2013

4. Tlawhtu Kohhran: Tuikual South Kohhran

5. Kal zat: Mipa -11 , Hmeichhia – 3

6. Tlawh chhan: Quarter zauh

7. Hnathawh: Biak In sak

8. Senso: ₹. 2,55,276

9. Lawmna lam: Sukmohan khua hi Udaipur Bial pian hma chuan Tuidu Biala awm thin a ni. Tuidu Bial Gospel Team rawngbâwlina avângin he khuaah hian ringtu an lo awm tan a. Heng ringtute inkhawm nan hian Bialin Biak In an saksaka, Udaipur Bial lo pian hnu kum 2009-ah Tuikual South Kohhranin Bialtu Pastor kaihhruainain heng ringtharte enkawl tur hian thawktu a dah ta a ni. An Biak In hi lei chhuat niin lei bang zut mam leh a chung rangva a ni. An Biak In sak that a tulin an leng lo ve ta der mai a. Kohhran member-te hi thalai leh naupang têtê an ni a, nu leh pa uaptu an nei tlêm hle. Chuvângin, Tuikual South Kohhran Ramthar Committee chuan he Biak In sa tur hian ni 26 Nov. – 6 Dec., 2013 chhûng khân Biak In sak

chhonzawmin sak zawh a lo ni ta a ni. He Biak In saknaah hian ringtharte'n hnatlâng kovin tha an thawh nasa hle.

Biak In len zawng – A dung ft. 30 leh a vang ft. 18, a chhuat cement, a chung rangva, a rurel skirting thleng concrete niin thingzaia zawm a ni a, a bangah Tile hman a ni.

Biak In hawnni 29 Dec., 2013-ah Rev. Lalchhuanmawia, Secy. (SMB)-in a hawng a, mi 14 laiin a kutah Baptisma an chang nghal bawk. An khaw hotu (*Chairman*) pawh Baptisma chang zingah hian a tel nghe nghe a, hei hi kan lawmna pakhat pawh a ni reng a ni. Biak In hawn thar ațanga chanchin ziah lai thleng hian membar 31 an awm. Pathian hnathawh ropui lo lang zel avâng hian kan lawm hle.

He rawngbâwl hna thawk thei tura hriselna min petu leh kan tum anga tluang taka min hruaitu Pathian chungah kan lâwm em em a ni.

Lalsawia, Secretary,
Tuikual South Koh. RT Committee.

CH.

1. **Filed Hming** : Home Mission South
2. **Khua/Mission Centre** : Diblibagh
3. **Tlawh hun chung** : Ni 10 – 17 Nov. 2012
4. **Tlawhtu Kohhran** : Ramhlun Sports Complex Kohhran
5. **Kal zat** : Mipa 11, Hmeichhia 4
6. **Tlawh chhan** : Hnathawh
7. **Hnathawh/Thiltih**: Biak In sak
8. **Senso zat** : Cheng 53,000
9. **Lawmna lam**: Diblibagh Kohhran hi Tlabung Zodin Pastor Bial chhûnga awm a ni a. Zan dar 8:30 vêlah Tlabung kan thleng a, Bialtu Pastor leh Diblibagh-a Missionary Pu Lalropuia-ten min lo hmuak a. Bialtu Pastor a țawngțai zawh hnuin Diblibagh kan pan leh nghal a, a thlamuanthlâk hle. Diblibagh-ah hian missionary 6 an lo awm a, Primary Sikul leh Kohhran an enkawl a. Khawsak pawh hniam ve tak takte bula hlim leh phûr tak maia Krista tana an thawk hmel hmuh a nuam tak zet a ni. Biak In saa kan awm chhûng zawngin min lo dawnsawn dan leh an inpêknaah kan lâwm tak zet a ni. Ni 16.11.2012 zanah kan Kohhran member-a mi, nu

pakhat a boral hlahu mai a. Tlaivar tur Kristian tih tham awm ta lo chu keiniho pawh chhuat laia ðuin kan tlaivar ve ta zak a, kan tân thil tawn thar chhinchhiah tlâk tak a ni e.

Laldinliana Sailo, Secy,
Ramhlun Sports Complex Kohhran
Ramthar Committee

D.

Field hming : Tripura Mission Field.
Kohhran : Tuingoi Kohhran
Tlawh hun : Ni 6 - 12. Nov. 2012
Tlawhtu : Thenzawl Vengthlang Kohhran
Kal zat : Mi 20
Tlawh chhan : ðawngtaina In sak
Senso : ₹ 72,140

Lawmna lam: Tuingoi Kohhran hian Pathianni tlai apiangin ramhnuaiyah hulhliap awm lovah an ðawngtai ho ðin a, fur lai leh khaw nawm loh niin hrehawm an ti thei hle tih Ramthar Committee-in kan lo hriatin an ðawngtaina In saksak a ðul hle a ni tih kan hria a, tih puitlinsak ngei kan tum a. Chutiang tak chuan fehchhuakin kan zuk saksak thei ta a. Ni thum chhüngin he in (16ft X 16ft) hi kan sa zo va, an Kohhran mipui pawh an lâwm hle. Tin, kan châm chhüngin kan inpawh ðha hle a, Pathianin kan tih tur tak ti theia min siam hi kan lâwm hle a ni.

C. Vanlalnghaka, Secy
Thenzawl Vengthlang Kohhran
Ramthar Committee.

E.

1. Field Hming : Tripura Mission Field
2. Khua : Patichhori Kohhran
3. Thawh hun chung: 26th Nov – 2nd Dec, 2013
4. Tlawhtu Kohhran : Serchhip Field Veng Presbyterian Kohhran Ramthar Comt.
5. Kal zat : Mipa – 17, Hmeichhia – 3.
6. Tlawh chhan : Biak In sak
7. Senso zat : ₹ 52,500

8. Lawmawm lam: Kum 2013-a Field Veng Kohhran Ramthar Committee-in Ramthar Feh chhuah (work camp) kan lo pass

chu Pathianin kan rorel te min tihhlawhtlinsak a. Ni 26.11.2013-ah Serchhip chhuahsanin Ni 27.11.2013-ah Patichhori kan thleng a, Kawng lakah Pu C. Lalengliana leh Pu Dindina Zawlnuam-a miten min lo thleng a, an chhûngkaw hnih chungah kan lawm hle. Ni 29.11.2013 hian Biak In sak ãan nghal a ni a. Biak In len zawng hi – A dung ft 52 leh a vâng ft 22 a ni a, a hmun hi laih zawl sa a ni. Zing dar 5:00 ațanga hna ãan nghalin, ban khur laih zawh hnuah Biak In lungphum Pro. Pastor Banulal Molsom (Pu Mawia)-an a phum a, hun hman zawh hian hna chhunzawm lehngal a ni. Ban 10 phun nghal a ni a, taibîm dah kual vek a ni a, ft. 6-a sâng ban hi chhûn vek a ni. Thingzai lamin a daih loh avangin tawpsan a ni a, tukverh chokut 8 siamsakin, kawngkapui chokut 2 siam a ni bawk a ni.

Thilpekte: Pulpit hlui, pulpit chair, maicham, lectern, ãutthleng 4ft a sei 7 leh secondhand 10 bags kan kensak a. Heng kan hna laklawh taka mai hi chhunzawm leh kan châk hle a, Pathianin a chhunzawm tur kohhran a pêk leh ngei theih nan Pathian hnênah i dilpui ang u. Keini Serchhip Field Veng Kohhran Ramthar Committee-te Pathianin Ramthar Field-ah Biak In sak min phalsak avângin Pathian chungah lawm thu kan sawi mawlh mawlh a ni. LALPA CHU FAKIN AWM RAWH SE.

9. Thubelh: Patichhori Kohhranten min lo dawnawnaah lawm thu kan sawi a, kan thlen ni ațangin Kohhran Inkhawm pawh kan kutah an dah vek a, Patichhori Kohhrante member 170 vêl an ni a, an darh sarh deuh avângin inkhawm kan ãha thei vak lo. Kan châm chhûngin Kohhranhote ni tin hnatlângin kan thawk ho va, an taima hle a ni. Kohhran lamah pawh an ngaihtuahawm lo hle a ni. Ni 4 chhûng kan châm hnuin ui takin mittui nen, inhmuh leh châk ngawih ngawihin kan in mangãha ta a ni.

Lalchhandama

Asst Secy, Ramthar Comt, Serchhip Field Veng

F.

- 1. Field Hming** : Home Mission South
- 2. Khua** : Putlungasih
- 3. Thawh hun chung:** Ni 23th – 27th Dec, 2013
- 4. Tlawhtu Kohhran** : Kohhran Pavalai Pawl, ãthuampui –

Aizawl.

- 5. Kal zat** : Mipa – 12
6. Tlawh chhan : Christmas hmanpui
7. Senso zat : ₹ 40,804

8. Lawmawm lam: Pavalai-ten tih tak zeta Pathian faka an lam an hmuhin Bru pahoah nasa takin hna a thawk a, kan haw hnu-ah zai khawm te rawt zuiin an hlim em em a, kan Kohhranah Chhûngkaw 5 an rawn inpe bawk a. Thawktute thawh hona a thain ringthar leh thawktute inpekna hmuhin mi a tichak thar hle a ni.

9. Thubelh: Thuampui Kohhran Pavalai-te kum khat chhûnga tum nhih kan feh chhuak thei hi lawmawm kan ti a. Putlungasih Kohhran te hi ₹ 10,000 pek an ni bawk. Tin, Home Mission South lama kan kohhrante hi tisa leh thlarauah thlamuan an ngai hle a ni tih kan hmuh chhuah phah bawk a ni.

C. Lalmuanawma, Secretary
 Kohhran Pavalai Pawl
 Thuampui, Aizawl

G.

- 1. Field Hming** : Tripura Mission Field
2. Khua : Sibbari, Tripura
3. Thawh hun chung: Ni 07th – 16th March, 2013
4. Tlawhtu Kohhran : Kohhran Pavalai Pawl, Thuampui – Aizawl.
5. Kal zat : Mipa – 17
6. Tlawh chhan : Thawktu chenna in sak (work camp)
7. Hnathawh: Thawktu chenna in Ft. 12 X ft. 24-a lian, scarting brick rem a ni a, septic tank siam a ni. Ceiling te siamin, electric te wiring-sakin, gas dahna leh bual in leh chhuar te siamsak a ni.
8. Senso zat : ₹ 57,481

9. Lawmawm lam: Thawktu hrang hrang te leh Ringthar te thawhhona a tha a, Thawktute inpekna a nasa hle a ni. Kan thawktu Nl. H.S. Lalmuanpuii hian nasa takin a tuar a, a hmun hi kan ringthar Pu Shachi Kumar ram a ni a, an chungkua hi Hindu nen an la inawmpawlh avangin ram chungchangah harsatna tawh mai theih laiin kan kal

lai hian ram pekna lehkha ziah felpui a ni hi lawmawm kan ti hle.

10. Thubelh: Thawktute tan hian kan kalpui te zinga miten Water Pump phal takin an pe bawk a, kan lawm tlang hle.

C. Lalmuanawma, Secretary
Kohhran Pavalai Pawl, Ṭhuampui, Aizawl.

NG.

- 1. Fieldhming** : Home Mission South
- 2. Misssion Centre** : Tlabung Chawnpui Bial
- 3. Tlawh hun chhûng:** 28th Mar- 1st Apr 2013
- 4. TlawhtuKohhran** : Chhinga Veng Kohhran
- 5. Kal zat** : Mipa 8 , Hmeichhia 2
- 6. Tlawhchhan** : Good Friday & Easter Sunday hmanpui leh Kohhran hmalâkna (project) en thlithlai.
- 7. Hnathawh** : Good Friday leh Easter hmanpui
- 8. Senso** : ₹ 46,390
- 9. Lawmna lam:** Bial chhûnga thawktute ṭhahnemngaihna, ringthar naupanghote Pathian fak hmêl leh an ṭhahnemngaihna a lâwmawm.

10. Thu belh: Chakma Gospel Team-te ṭhahnemngaihna a ropui, an hma a zau hle. Team hi thlarau lam thil mai piah lamah tisa tak pawhin an mamawh a tam hlein a lang. Kohhran pawl dangten nen an inkar boruak hian sual a titlangnêl.

T.Upa H.Lalmuanpuia, Secretary
Ramthar Committee,
Chhinga Veng Kohhran

H.

- 1. Field Hming:** Home Mission South
- 2. Khua:** Hmunlai – Chawngte Pastor Bial
- 3. Thawh hun chhûng:**
 - 1) Wawi 1-na Ni 7 - 17.12.2013
 - 2) Wawi 2-na Ni 27.1.2014 - 01.02.2014
- 4. Tlawhtu Kohhran:** Zemabawk Kohhran
- 5. Kal zat:** Wawi 1-na Mipa 8; Wawi 2-na Mipa 5
- 6. Tlawh chhan:** Hnathawh

7. Hnathawh/Thiltih: Biak In sak

8. Senso zat: ₹ 1,36,907

9. Lawmna lam: Pathian hnathawh avanga Kohhranhote inpêkna a ropui êm êm a. Kohhranhote thawhlawm thawh khawm ațanga he Pathian Biak In hi sa thei kan ni a. Pawisa fai mai bâkah an motor-te phal taka min hmantirtu Kohhran mite kan nei zel a. Tin, kan va tlawh kohhran pawhin ni tinin min țawiawm țha hle a, Biak In thar țha tak an nei tur chu an lawm thiam êm êm a; an Kohhran member hi tam lo mah sela, an thawh hona a țha a, Kohhran nung tak an ni a. Kan haw dawnah phei chuan mittui nen kan inthlah hial a ni.

10. Thu belh: Hmunlai Kohhran hi Chawngte Pastor Bial chhûnga mi a ni a. Kohhran chhûngkua 11, member 73 awmna a ni. He Biak In a dung ft. 48 leh a vâng ft. 26 sa tur hian Hmunlai Kohhran hian kum sawm lai an lo soal tawh a. Mahse an Kohhran an pachhiat deuh avângin a *skirting* thleng bâk an sa thei lova. An harsatna hi hriatpuuin Zemabawk Kohhran Ramthar Committee bultumin kan va saksak ta a ni. Pathian kaihhruianain tluang takin, *electric wiring* thlengin kan va zo thei a, kan lâwm tak zet a, a Kohhran neitute pawh an hlimin an lâwm thiam hle a ni.

Lalbiakkima, Secretary

Zemabawk Kohhran Ramthar Committe

I.

1. Field hming: Home Mission

2. Khua / Misssion Centre: Cachar Kahrawt

3. Tlawhhunchhung: 19th – 22nd Mar 2013

4. TlawhtuKohhran: KTP Dawrpui Branch

5. Kal zat: Mipa 39, Hmeichhia 12

6. Tlawh chhan: Hnathawh

7. Hna thawh/thiltih: Kahrawt Pastor Quarters kawt, Tuizem dahna tur kan lai zawl a, Kaisanary Biak In bul, Presbytery an thlen huna Pandal an zârna tur kan lai zawl bawk.

8. Senso: ₹ 66,135

9. Lawmna lam: KṚP-in Ramthar Feh chhuah kan sual thlu ve thei hi kan lâwm hle a, Kohhranhote ṭawngṭaina zârah tluang takin kan thawk thei a, kan lâwm hle. Pastor-te chhûngkua leh Winchester School-a thawktute chhûngkua zawng zawngin min buaipuina zawng zawngah kan lawm êm êm a ni. Kan Kohhran Committee-ten sum lam mamawh zawng zawng min tumsak avângin kan Feh chhuak ve thei a, kan lâwm hle baw.

Jimmy Lalthianghlina, Secretary,
KṚP, Dawrpui Branch

J.

1. **Field hming** : Home Mission South
2. **Khua/Mission Centre** : Tuikawi
3. **Tlawh hun chhûng** : 28th Oct.– 4th Nov. 2013
4. **Tlawhtu Kohhran** : Thenzâwl Vengthlang
Kohhran Pavalai Pawl
5. **Kal zat** : Mipa -17
6. **Tlawh chhan** : Hnathawh
7. **Senso** : ₹ 57,764
7. **Hnathawh:** Sikul office sak (28x15+varanda) heng bâkah hian office dawhkan 6 siam a ni. Chhuata phah tur carpet leina tur sum hlan a ni baw.

9. Lawmna lam: Ramthar hnathawh tura kan inbuatsaih aṭanga a tawp thlenga Pathian min hruaina kan hmuhin kan lawm tak zet a, hnathawka kalte lungruual takin kan thawh ho bâkah innelna thar duhawm tak kan neih phah a ni. Tin, a thawktute inpêkna kan hmuhin lawmawm kan ti hle baw.

Upa Zolâwma, Chairman, Kohhran Pavalai Pâwl
Thenzâwl Vengthlang Kohhran (*Pathian khawngaihna zârah Ramthar rawngbâwla feh chhuah kawngah ṭhahnem kan ngai zual zêl a, feh chhuahna chanchin chhuah tur a inhnawttawng ta deuh va, tun ṭumah hian kan han tichhuak uar deuh va, Kohhranhovin in lo hriat thiam kan beisei.....Ed.*)



**KUM 2014 CHHÛNGA RAMTHAR THILPÊK PETUTE
(03 March - 07 April, 2014)**

PETU	PÊK ZAT	PÊK NI
1. Pu F. Lalênga te chhûng Pi Bonny Lalruatkimi in kâng tanpuina, Tripura	₹ 2,000	03.03.14
2. Dam Veng Kohhran Damparengpui Kohhran Biak In sakna	₹ 10,000	04.03.14
3. Champhai Vengthlang Bial KH Panchamagar Biak In Thutthleng siamna	₹ 35,000	07.03.14
4. Bethlehem Kohhran Itanagar Bial Mowb-II Biak In sakna	₹ 3,00,000	19.03.14
5. Tanhril Vengthar Koh. Ramthar Comtt. HMS Vaṭhuampui Bial Simensora Biak In sakna	₹ 20,000	19.03.14
6. Ramhlun Vengthar Bial KH (1) HMS Hmawngbu Clinic Room sakna (2) Zawlpui Sikul tanpuina	₹ 70,000 ₹ 50,000 ₹ 20,000	19.03.14
7. Bawngkawn Chhim Veng Koh. Ambassa Bial Lachari-I Biak In chung	₹ 40,000	19.03.14
8. Zonuum Kohhran Manikbond Biak In sakna	₹ 1,00,000	19.03.14
9. Venghlui Bial KH Nepal-Sundarpur-a Thawktu chênna In Tukverh/Electrik wiring	₹ 20,000	24.03.14
10. Upa Lalchawia te chhûng, Chaltlâng Dolchhora Biak In sakna, Cachar Tlângram	₹ 20,000	26.03.14
11. Darlawn Venghlun Kohhran Marpara Chakma Convention tanpuina	₹ 10,000	26.03.14
12. Hunthar Kohhran Sarihajan Biak In sakna-Karbi Anglong	₹ 20,000	27.03.14
13. Luangmual Vengthlang Kohhran Sarihajan Biak In sak tanpuina - Karbi Anglong	- ₹ 30,000	27.03.14
14. Bawngkawn Kohhran Sarihajan Biak In sak tanpuina - Karbi Anglong	₹ 10,000	01.04.14
15. Khatla Kohhran Guabari Biak In sakna - Barak Area	₹ 1,00,000	03.04.14
16. Saron Veng Kohhran RT Comtt. Hudra Koh. Biak In sakna - Patna Field	- ₹ 2,00,00	03.04.14
17. Khatla 'N' Kohhran (1) Rongmola In sakna (Tripura) (2) Thikiching Biak In sakna (Tripura)	₹ 1,40,00 ₹ 60,000 ₹ 80,000	07.04.14

(* Lamtawi - Koh=Kohhran, KH=Kohhran Hmeichhia, Comtt=Committee)



Longnit Borjon, Karbi Anglong Kohhranhote'n bân pharin
'Hnehna chu Lalpa ta a ni', 'Lalpa chu ropui ber rawh se', tia
hnehna puangin, chung milem pathian biakna hmanruate
chu hâl ral a ni ta a ni.



Ni 13 July, 2014
Masihi Sangati Evangelist atâna lâk thar mi 17 Tirh chhuah
Inkhawm Hindi Bible School Chapêl, Bawngkawn

COUNSELLING MAMAWHITE TÂN

Mi mal, nupa, fanâu, chhôngkua, nulât tlangval, ringtu nun adt.-ah
harsatna i neih chuan Family Guidance & Counselling Centre pan thîn la,
an lo tanpui ang che. Telephone leh Internet hman pawhin biakrâwn
theih an ni:

Main Centre: Mission Veng, Aizawl - Ph.03892324443
Branch Centre: Chanmari, Aizawl - Ph. 03892306693 - email:
synodfgcc@gmail.com

Postal Regn. No.MZR/46/2012 - 2014

RNI Regn. No.40889/ 88



KARBI ANGLONG

Sarihajan Mission compound-a Missionary-te
ni 3-5.7.14 khân Chanchin Ṭha Beihpui thlâk turin
Upper Dillai-ah an feh chhuak .
(*Kan Missionary-te hi hetî reng mai hi an ni a, Kohhranhovin
zing Iua awm Iova kan ṭawngṭaisak ṭhin a ṭul hle...Ed.*)

TO RAMTHAR

If not delivered please return to:
The Manager
Ramthar Chanchinbu
Synod Office, Aizawl, Mizoram,
India. Pin - 796005

**Published by Rev. Lalchhuanmawia and Printed at the
Synod Press, Aizawl on behalf of Ramthar Association,
Aizawl, Mizoram. Copies- 28,800**

Visit us: www.mizoramsynod.org